

四庫全書

集部

欽定四庫全書

集部

金文靖集卷一

詳校官編修_臣裴謙

中書_臣劉源溥覆勘

總校官進士_臣朱鈐

校對官中書_臣楊世倫

謄錄監生_臣王聞

欽定四庫全書

集部六

金文靖集

別集類五
明

提要

臣等謹案金文靖集十卷明金幼孜撰幼孜有北征錄已著錄幼孜在洪武建文之時無所表見至永樂以訖宣德皆掌文翰機密與楊士奇諸人相亞其文章邊幅稍狹不及士奇諸人之博大而雍容雅步頗亦有隨蓋其

時明運方興故廊廟賡颺具有氣象操觚者亦不知也千頃堂書目載幼孜集十卷又外集一卷又北征集一卷今外集未見朱彞尊靜志居詩話稱其北征集大漠窮沙靡不身歷時露悲壯之音則彞尊猶及見之今亦未見是編為其子昭伯所輯詩文多應制之作蓋即黃虞稷所謂十卷之本別冠以三朝恩榮錄一卷則其勅諭誥命祭文像贊神道碑

之屬幼孜事蹟已詳明史核以本傳此錄多
其子孫誇侈之詞無關考證今刪去不載惟
以本集著錄焉乾隆四十六年三月恭校上

總纂官

臣紀昀臣陸錫熊臣孫士毅

總

校官

臣

陸費墀

欽定四庫全書

金文靖集卷一

明 金幼孜 撰

五言古詩

長林書屋為學士胡公賦

我昔遊青原聞子廬滄洲近瞰芙蓉山遙睇大江流繞
屋植嘉木開軒面良疇繁陰奪炎夏爽氣迴高秋庭除
鳥雀靜白日人事幽牙籤積架上縹帙盈案頭講誦窮

晝夜奮力追前脩羣言極探索小大悉搜求藏脩既有
時俛仰隨所由朝吟倚蒼竹夕覽登高樓援琴酌白酒
盍簪聚朋儔抽毫落風雨揮劍拂斗牛一朝齒鄉校戰
藝即見收高舉薄霄漢遠覽帝王州匡時展經術所志
在伊周清華職論思秉筆贊鴻猷步趨邇禁闥顧問紆
宸旒侍從十五載荷蒙恩寵優去年省桑梓偶得尋舊
丘徘徊撫林木感歎非昔遊滄波去浩浩白雲日悠悠
鹿門未有期小山不可留臨風駐遐想悵恍增煩憂因

之寄圖畫聊復寫綢繆尚期返初服白首同歸休

辭劍圖為學士胡公賦

楚平席僭偽任邪斥忠良伍奢既就烹子胥遂奔亡出
疆適吳會追者何太忙行行至江潯欲渡津無梁邂逅
得漁父哀窮濟以航感此脫危厄解劍聊為償父也義
不受長揖增慨慷嗟彼囊中人結交布周行刎頸誓莫
逆笑談出肝腸一朝嬰禍患變情非故常父也諒非舊
急難卹勸利害等絲髮萬金一毫芒高風振頽俗百

世仰餘光夫子尚志節撫圖不能忘寫之置座隅懷古
意何長斯人不可見三復涕沾裳

清白堂為楊庶子賦

關西昔華胄太尉古名臣直節照簡冊清風動冠紳遂
令千載下流光播無垠偉哉建安派閥閱何嶙峋夫子
負傑特學術孰與倫蜚聲起庠序高步凌風雲決科振
場屋射策登紫宸詞垣清切地列職逾十春瞻依近日
月蒙被恩寵新從容念先訓所志在忠勤於焉揭華扁

文藻麗青旻左右列圖史退休時討論庭空絕私謁來
往稀迴輪兢兢慎操履栗栗保貞純冰壺湛秋月玉雪
含幽芬匪圖淑來裔庶以希前人蹇予忝侍從託交誼
彌敦耿耿懷補報恒恐貽緇磷登堂仰休聞企瞻愧後
塵作詩寫衷曲聊以申同寅

惠迪齋為臨川劉紀賦

西江有佳士文采何陸離少小入庠序所習書與詩兢
兢循軌則抑抑謹威儀順理身逾泰寡欲心自怡匪茲

卜休咎實以嚴操持天地有常運寒暑不違時生人有
常道所志在秉彝內省苟無愧安命復奚疑愚者昧厥
理蹈險去坦夷違天伐恒性倒行兼逆施一朝罹顯罰
寧復救顛危所以古賢聖懇懇垂訓辭齋居託令名進
脩誠在斯績學匪空言力行思有為乃者辭鄉邑吐氣
凌虹霓振衣遊太學揖讓何委蛇及茲被寵命筮仕固
有期直道苟不同志行寧有虧努力慎朝夕永保期弗
墮

酌泉齋為嘉靜吳員外乃弟賦

昔有吳刺史飲泉著清聲廉貪勵高節千載揚芳馨聞
孫家淦曲結屋依巖局青山列戶牖嘉木羅前楹流泉
出砌下一碧湛泓渟齋居誦遺訓仰止思繼承白雲蔭
芳潤皓月涵虛明永日愜幽賞頻仰挹清泠一酌祛煩
慮再酌怡神形三酌沁肌骨頓使心目清匪茲樂澹泊
實以固幽貞嗟彼懷中人胡乃獨營營沉酣嗜麴蘖夜
旦了不醒視此酌泉者寧不畏惕驚寒子慕脩潔清華

邇蓬瀛幸茲遠氛濁漱滌瓊瑤英凜焉對冰雪朝夕懷
兢兢誓圖堅晚節補報竭忠誠因斯發佳詠聊以寄高
情

贈李伯高司訓還廬陵

廬陵古名郡風俗天下聞卓哉歐陽子奮發振斯文聲
光被後世至今仰餘芬惟子企前軌力學究典墳棲遲
三十載布衣誰與羣忽茲膺薦舉我冠上金門授以郡
博士文采耀青雲今晨別我去悵然惜解分臨歧重握

手酌以白玉尊朔風吹浩浩雨雪何紛紛抽帆上南浦
行行近青原及家固云樂況乃親弟昆塞子荷恩遇謬
忝職禁垣西江未同返遙睇瞻丘園解佩為子贈聊復
申好言勗哉繼先達浮名何足論

梅憲為教授金原祺賦

嚴冬閉雲陰衆卉各摧折瑤樹粲佳花綽約凌冰雪君
子秉文教終歲擅高潔宜期謝春榮所志堅晚節觴詠
日逍遙琴書足娛悅願言保貞姿庶以紹先烈

三友軒為德清鈕允高賦

種樹必嘉種取友必端士常木無堅姿泛交少恒志之
子慕清貞列植異凡卉直幹倚脩節孤芳挺蒼翠冰雪
誓不渝並立凌寒歲曉物尚如此託交寧有異君子思
賤貧小人懷勢利管鮑夫何如此道久淪棄尚期秉金
石庶以敦高誼

郊祀齋宿翰林奉東諸同寅

大郊屆嚴祀致齋玉堂署衣冠集寮寀及此諧良晤焚

香對蒼竹促席坐深戶東風昨夜來佳雪消餘汨庭草
抽細芽新條發幽樹感茲節候殊忽令鬢成素顧惟負
簡陋樸樸慙虛譽未能寡尤悔但恐辜恩遇幸茲同職
業規益賴深助清談夜未央澹然銷衆慮對越實在茲
寧敢忘祇懼將事期無數庶以荅神祐

魯林懷思詩為太常孔克准賦

尼山誕元聖大道斯以彰刪述著彞典筆削明王章冠
冕照日月端拱居廟堂禮樂極崇報萬世垂耿光闕里

建東魯閭閻何煌煌詩書啟華胄奕葉揚芬芳迢迢姑
蔑墟遺澤久彌昌於焉有裔孫妙齡際時康一朝被恩
眷超擢居太常青雲耀簪紱儀羽遙鵷行眎彼洙與泗
源深流且長惕焉企先躅引領增慨慷宜無蘋蘩薦道
遠不得將雲山浩漫漫杏林鬱蒼蒼徘徊感霜露惻愴
悲中腸寫圖寓深臆懷思固難忘願言紹先緒庶以慰
所望

梅所詩有序

永豐嚴所安氏負耿介之資抱通明之學於世無所嗜好而獨愛夫梅之清潔乃于所居種梅數十株日與相對以樂其性情蓋有終焉山林之意遂名其室曰梅所既而所安宦游于外者幾二十年其心神夢寐無一日而不在於梅者間來京師求予作詩以寫其歲寒之思夫梅於植物中最為高潔有幽獨貞介之操無纖穠軟媚之態古人以之比其德君子豈苟然而已哉今所安年逾七袞志彌篤而操彌堅特立

之行凜然而不可奪誠可謂名實相符者矣為作梅
所詩其詞曰

君子謝時好幽居恒晏如開軒種梅樹宛若臨西湖託
根既得所不受纖塵汙歲寒濯冰雪粲粲明肌膚幽芳
襲圖史疎影交座隅於焉企高潔澹泊聊自娛一朝領
文教中道異所趨夢寐二十載延想徒踟躕素心諒可
託白首期不渝他時幸歸老庶以返其初

雪梅為壻袁大鵬賦

憶昨家居時種梅繞書屋歲寒綻佳花滿林散芬馥玉
肌耀彩雲縞袂承朝旭把卷時相親巡簷看不足一朝
上蓬萊幽賞更難復耿耿懷不忘夢寐在林谷偶然披
畫圖覽翫增躑躅維子愛重之結交誼尤篤無為媚冶
容汨沒隨流俗脩潔慎自持予以保貞獨掛冠倘可期
吾將返初服

輓呂處士禮部尚書震之父

藍田貴名胄世德重高門處士樂嘉遯夙昔行誼敦棲

遲托韋布所志在丘園積善逾懷懇裕後尤諄諄賢嗣
奉明訓績學希前聞發身耀科第踐歷揚清芬操持厲
冰雪穆若春陽溫南宮進華秩廊廟資經綸厚祿遂榮
養寵錫尤續紛詎期慘風木銜哀竟無言聖情重褒卹
錫命賁九原存歿被光耀感此天地恩述德表貞石遺
風儼猶存作詩寫哀些予以告後昆

雅集圖為鄒侍講仲熙賦

王氏昔貴盛幽賞寓西園佳花雜芳卉脩篁蔭叢蘭

瑤林鬱深秀，亭榭無罨氛。時雨被繁綠，好鳥鳴間關。興
言念君子，列籍聯衣冠。光風汎瑤席，餘靄襲芳樽。豆籩
既有序，詠歌何紛紜。杯至迭酬酢，劇談有餘歡。揮麈睇
飛鴻，解纓濯流泉。援琴度逸響，灑翰生雲烟。夷曠各有
得意適，欲忘言遺風。寄圖畫高致，遡難攀蘭亭。世已遠，
所托在斯文。蘇黃去已久，光價重璵璠。撫事增永歎，徒
此懷清芬。

此圖自東坡潁濱山谷而下，凡十有三人。西園乃晉

御之別墅也當時宴集於此李伯時寫此為圖以傳
於世仲熙此圖特其模本耳

題楊諭德畫竹

楊子居巷南閉門絕車馬種竹不計年濃深密相亞朝
回解冠珮對之極瀟灑簷端落晴雪涼籟含深夜我時
一相過絃琴坐其下得句寫琅玕笑歌傾盞斝冰霜歎
遲暮寒暑頻代謝悠悠十五載念子知音者兩京昨睽
違良晤此傾寫玉堂燈火寒看竹仍題畫

貞壽堂詩

白璧易為玷寡居少完節宛宛令母儀娟娟抱幽潔二
十失所天中道遭飢餓秉心靡他適誓死弗回折高堂
何巍巍翠柏凌霜雪遐齡介眉壽莫景耀黃髮有子足
侍養有孫足娛悅堂前綵衣舞堂上旨甘列懿德及鄉
閭清風敦闕閱載誦栢舟詩永言播貞烈

贈蕭醫士

蕭子擅醫名不假藥石功以心運元氣斡旋掌握中婁

生嬰熱疾蕭子撫其躬默運極冥搜頃刻皆流通化熱
為清涼去煩息忡恫勿藥收奇效名聲播西東報謝却
金帛高誼邈難同一朝持大軸來語玉堂翁為之發佳
詠浩思意無窮

贈李翊赴南京國學助教

建昌人

子昔負奇氣攜書游泮庠學成邁流輩策足馳康莊
然撥鄉薦職教居蜀邦樂育著成績陞擢閩海旁講道
心靡懈善誘極周詳於茲復九載化雨深門墻既最天

官考超秩嚴詮量謂子才力優豈宜專一方分教登曹
學斯文有榮光時當仲冬候旋載南京航河水凍未堅
執別途路長翔風振林木鴻雁鳴且翔徘徊不能去浩
歌慨以慷願言厲初志為國成俊良作詩寫朋好白首
無相忘

春意圖

春陽政和煦衆卉相滋榮名花豔秀質丹霞濯朱英衆
鳥意頗適雄雌相和鳴大氣流天地物物同生成因茲

觀至理誰能契中情

壽諼堂為德清屠生誠作

諼草樹北堂雨露日蕃滋慈母欣有托撫翫心獨怡門
庭日無事鶴髮明春暉之子念母慈致養及良時朝朝
具甘旨炫耀五采衣再拜獻春酒泛此黃金卮祝母多
壽考千歲忘憂思歲歲對諼草願母長不衰母壽不易
得子心將何為謹言與慎行戰兢當自持顯揚報母德
不使聲名墮歸哉尚努力惜此光陰馳引領日相望重

來應可期

筠軒為脩謨陳旻剛乃父作

閩中有佳士翛然偉丰儀間居澹無營與世恒相遺
開軒種修竹歲久蕃且滋流雲被柯葉雨露涵幽姿清飗
振蒼玉舞鳳何委蛇直節靜相偶虛心久能持絃琴雜
宮徵戛玉聲相隨悠然發佳興觴詠無不宜幽賞諧淇
澳高風猶可希願言保貞獨歲晏以為期

陳氏竹甘露

猗猗淇園植羅生滿階庭夕光流素液垂茲泣瑤英灑
枝方泥泥綴葉猶盈盈當陽殊未消承風愈堅凝孰知
太和世涵澤被羣生彼媿君子者素行此其徵

萬竿烟雨圖為侍讀曾鶴齡作

平生愛佳竹常有江南情忽此見新圖玩之有餘清千
竿挺寒玉一片瀟湘青離離紫鳳梢尚與烟雲平依微
拂崖石隱約入杳冥聲雜瀑泉小色映寒溪明茆亭亞
蒼雪美韻諧琴聲旁有灌木蒙鳥雀時喧鳴秋風即搖

落窻兀枝交撐獨高此君節寒暑無變更不逐桃李芳
不隨蒲柳零惟應松與栢可以同堅貞

贈顧進士讓南京刑部主事

蚤歲負超卓畢力窮書詩一朝掇高第歷試將有為秋
臺與簡擢郎署秩匪卑茲焉涖舊都聖心尤倚毗邦刑古
所重欽卹誠在茲慈祥察冤滯讞議公是非伊昔虞舜
世皋陶稱士師明刑弼至教世乃登雍熙惟子居部屬
致理誠所宜勉勉服古訓兢兢慎操持勗哉踵前列永

矢期弗墮

湖山佳趣為黃博士賦

屏迹慕閒曠素有高世姿結茅謝塵鞅澹然心自怡湖
光涵几席山色臨書帷游魚戲文藻好鳥鳴高枝橫琴
芳樹下濯足清澗湄開樽酌美酒揮毫賦新詩緬懷百
年內誰復同襟期一朝際休運忽與雲壑辭薦書達名
姓文采何陸離昨來居太學橫經擁皋比羣才資樂育
講授忘渴饑出處諒不偶隱顯固有時相期貴努力補

報方在茲他年謝簪紱庶以慰心思

中秋讌集分韻得九字

聖皇撫區夏省方事巡狩蹇予忝侍從亦獲効奔走杪
春始駐蹕和氣動郊藪良辰奉鸞馭周覽徧丘阜窮幽
撫竒秀幸免載芻糗寒暑倏更換星虛已屆酉於焉屬
秋半讌會集寮友看羞列長席時果薦芳豆開尊對明
月序齒論先後灝氣滿瓊樓寒光達虛牖遙空淨纖翳
河漢斜臨斗零露浥叢蘭涼飆振疎柳盍簪有直樂飛

觴屢呼酒諠譁競酬酢笑語或揚肘分韻各有題誰能
為擊缶鄙詞愧珠玉剗削慙蕪莠俛懷際休運感激恩
尤厚畢力圖補報矢心期白首忝茲諧宿好託交歲年
久切慙賴啟沃洗濯脫塵垢追陪青瑣闥出入喜相偶
旅懷頓寬釋憂思亦何有良宵興未終既醉猶攜手南
樓桂始花東園菊方茂登臨有佳約相期在重九

九日讌集分韻得駛字

良辰不易得流光疾如駛我行忝扈蹕三時留帝里倏

茲屆重九朋從皆客子邀我開清讌烹羔膾鮮鯉時蔬
間棗栗羅列亦盈几紫萸汎新酒馨冽勝臘蟻喧呼熱
中腸笑談忘鄙俚酣歌引長劍光芒照秋水仰眎天宇
寬商飆颯然起候鴈屆新寒霜菊猶含蕊遙岑晚逾碧
西山淨如洗登高信非遠騁望增懸企幸茲會文飲勸
酬助深喜羣公爛詞藻清芬播蘭芷殷勤寫衷素抱拙
慙蟲技

贈友人謝繩正還新淦

憶我巾角初攜書侍嚴父訪君滄洲曲握手遂良晤碧
梧挺高標金蘭托深契硯席幸有託寒暄同起處朋情
謝新益麗澤愜衷素悠悠金石交歷歷歲年莫東西各
驅逐冠蓋何由聚南宮忝科甲青雲忽高舉叨承侍從
榮出入誠何補今春別京國北狩隨鸞馭回望南天雲
遙睇故園樹憑高謾躊躇對景增延佇君從梁宋來邂
逅慰羈旅天涯故舊情鐙前牢落趣時蔬薦辛盤肴核
侑芳醕劇談夜未央移席月當午但惜歡會難寧知別

離苦攬袂聽晨雞候此秋天曙我復趨承明君還故鄉
去鴻雁正南飛商飆動砧杵分攜五雲館翹首金臺路
望望不見君相思渺何許

蔣御醫靜學齋

伊人抱冲素而有冰雪姿齋居謝塵垢恒以靜自怡圖
書盈几案涵泳窺聖涯幽觀契玄妙昕夕忘渴饑寒暑
更代謝人事有盛衰萬變恣紛擾操存諒不移于焉企
遐軌俛與先哲期匪圖富經術復此專國醫金門振高

步永懷擴所施勗哉勵初志作詩效箴規

挽永嘉吳原範因其子翰林庶吉士吳志文之請
昔人志幽獨皎皎冰玉姿窮居閱今古言動無愆違力
行敦孝友耿介恒自持簞瓢澹無慮韋布聊棲遲翰墨
有餘暇吟詠多新詩懷玉匪求售末俗寧相知詎期溘
朝露遐逝竟莫追鄉閭增永歎親友含悽悲承家幸有
托顯揚方在茲太史述潛德千載昭銘詞

靜闇為黃學士尊人賦

端居謝塵鞅屏跡卧柴荆布衣樂嘉遯簞瓢澹無營幽
思契玄化冥搜觀物情神閒志先定寡欲心自寧琴尊
諧夙賞水木涵餘清簷端白雲下芳徑春草生永懷丘
園趣終辭圭組榮含光保貞固養德崇令名吾生愧擾
擾遐想尋鷗盟

分題得秋浦孤帆送友人

疾風吹入寒清霜肅天宇澄河浩漫漫抽帆上秋浦汎
汎凌雄濤搖搖轉孤嶼川途坐超忽飄飄驚鴻者舟子

誇利涉中流喧笑語誰識倚蓬人戀闕時延佇

頤庵為祭酒胡公賦

君子志古道中心常晏如一室絕塵想湛若凝冰壺幽
思契玄化靜觀識盈虛于以求所養揭頤當座隅匪徒
茲口實養德與之俱閑邪靡他適步履由康衢翼翼謹
儀度周旋慎起居言寡行彌篤體胖心自舒暢情發佳
詠隨意讀古書清風在几席翰墨足自娛揮絃白雲下
酌酒鳴禽呼鹿澤洽髦士咏歌追舞雩芹藻沐時雨桃

李亦芬數於焉陶聖化沛然樂有餘願茲保貞獨白首
期無渝

素闇為鄒侍講仲熙賦

結髮已學道而有高世姿衡門遠氛濁韋布聊棲遲
勉事畊稼蔬食甘藿藜中年邁休運遂與林壑辭辟雍
起名譽卓為學者師超登列清要侍從職論思忠誠彌
激切耿分恒不移俛仰靡愧忤操存無外馳安行任所
適進退何委蛇圖書列左右翰墨復在茲沈潛探幽蹟

涵咏窺聖涯孔子貴知命順理無不宜孟軻養浩然力行復何疑尚友千載士聖賢以為期

樂琴書處為沈民則學士賦

公本布衣士世家在東吳襟懷敵冰玉所樂琴與書牙籤挿滿架中有萬卷儲潛心究墳典雋泳周孔腴矻矻忘歲年晝夜窮卷舒興來操孤桐逸氣凌八區寒泉出幽谷清飗汎庭除一彈復一詠沛然樂有餘棲遲三十載仁仰恒晏如一朝去鄉里聲價重璫璵載筆青鎖闥

待詔承明廬光華依日月荷沐恩寵殊褰予忝侍從出
入聯珮琚朝回訪官舍文字聊足娛絃琴坐芳樹洗琰
酌清醑白鶴為起舞酣歌劇歡呼嗟彼寰中人此樂誰
能俱惟公與我輩職業儕文儒乾坤並生育雨露均涵
濡感此聖恩厚補報將焉圖願言竭忠藎白首期無渝
日省齋為駙馬趙暉賦

君子秉高志夙負冰玉姿齋居靜無譁玩習書與詩兢
兢日自省名賢為之師力行務忠信跬步恐或違講授

資劇切寧敢懷自欺黽勉竟朝夕念茲復在茲弘毅期
遠到一息固有虧作輟或靡常德業因以隳況乃託戚
里忠孝實所資嘉猷思獻納仰圖贊雍熙作詩匪為頌
庶以效箴規

贈孫博士致仕還豐城

孫君我鄉里十載居橋門雅志尚古道布衣振斯文羣
才資樂育仰欽博士尊講論既不竭考較良已勤小大
各有成寧復遺斧斤況聞篤義方有子才且賢伯也領

司牧季也登詞垣聯翩耀文彩宛若鸞鳳騫三朝偕際遇
涵沐雨露恩忽茲去榮養投簪賦歸田綸音重褒錫龍
章煥繽紛驪駒戒明發祖餞相攀援遙遙睇南浦江流
汎汎汭桑梓故無恙松菊今尚存上堂接賓親入室撫
兒孫閒居樂有餘逍遙畢晨昏寒子荷恩遇侍從三十
春白首冒榮祿補報圖拳拳故鄉未回往中情何由宣
因茲寫長句聊以道慇懃

贈楊景衡致仕還永嘉

時為福建叅政

早歲負經術文采耀儒紳明廷忽登薦熙運逢昌辰首
選夏官屬再擢領司勳九載績稱最超遷佐名藩優優
敷治理黽勉勤諮詢敫歷三十載踐履思彌敦及茲登
七秩陳詞乞歸田聖情特允許優老懷舊人清晨別閭
闔冠蓋擁青雲絲竹沸華筵飛觴促行輪迢迢踰大河
渺渺涉長津喬林翳桑梓竹樹蔭雲泉別墅日成趣猿
鶴時相親良辰集賓友諧詠樂琴尊以茲保遲暮眉壽
綿千春永言鴈朋好終始期勿諼

百日懷幼子武安

爾亡忽百日無日不念爾行想爾追隨坐想爾遊戲食
想爾同按卧想爾同被清晨送我朝未晚候我歸逢迎
與應答無不解人意如何遽天關長往隔人世悲號徹
上蒼抱痛切肝肺骨肉恩誼深誰能即捐棄

輓鳳陽周處士

其子銓為鴻臚寺丞與子為同年進士

士有慕恬素習隱居田廬逍遙畢冬春衣食自有餘孳
孳軫窮賈積善遍其圖飭躬務儉勤淑子惟詩書青雲

起步武敷歷陟要途及茲膺茂典寵錫先親俱恩榮及
存歿封秩偕鴻臚皇天報不爽陰隲默與符銘文屬太
史琢石崇丘墓桓桓松柏間雨露深涵濡流慶未涯溪
浩若江海儲昭茲貽後人永世期不渝

訥齋為泥田周仲升作

君子尚古道制行戒多言謹口不妄發恒以訥為先酬
酢合典則終身遠尤愆交遊重敦樸鄉里推仁賢嗟彼
寰中人辨給若濤翻往往速咎戾身名弗自全以茲貴

守默操制若管鍵高齋揭華扁圖史相周旋往來接朋
好終歲謝塵喧願言服古訓永永期弗諼

贈楊允嘉還建安

華胄出關西官譜何煌煌聲光照閩越慶澤深且長少
傳我知己早年登玉堂風雲際嘉會千載符明良表儀
動朝著事業輝巖廊報國竭忠藎治家敦義方今子皆
偉器清標重圭璋趨庭受經訓力學攻文章來往申定
省煜然多令望季也始弱冠明珠異非常丰姿玉雪瑩

行美芝蘭芳孝友出天性詩書能自強時時肯過我恭
敬不暫忘周旋情懇懇應唯聲琅琅有如丹穴雛羽儀
絢朝陽又如千里駒矯首欲騰驤我實愛念之期待不
可量昨者奉親命言旋歸故鄉侵晨向我別欲去仍傍
徨吾觀公卿間子弟空昂藏禮義漫不省況乃資顯揚
念子好兄弟承家相誼誼盛時須努力學問無怠荒豈
徒慰親志足以紹前光高高青雲步拭目看翱翔

凝秀樓為都御史邵玘作

君子秉純孝至和毓嘉祥重屋薦靈草郁郁休氣翔玄
雲被紫盖丹霞沃太陽煜煜銅池秀粲粲瑤圃芳輪囷
異衆卉五色耀奇章豈伊昭行美實以著休光況逢聖
明世位秩尤顯揚屬茲託邦憲毅然振宏綱奮威薄鷹
隼除暴驅豺狼蜚聲播畿甸美譽馳巖廊拳拳勵忠孝
勉勉贊時康昕夕期弗替終譽思永臧

贈鍾觀伯司訓新淦邑庠

為士貴立志志立名乃成所以賢聖徒尚志尤兢兢維

子我同里祖父實相知弱冠志已殊晝夜窮書詩春秋
紹家學講究探玄微明經夙抱負應聘來京畿金門特
召試辭添何陸離哀然居上第儕輩咸相推翩翩持教
鐸去作淦庠師清晨來告別執手聊踟躕驪駒且未動
盡此黃金卮大河日東注白雲正南馳朝經直沽北暮
駐長淮西鍾山屹相望廬阜雄且奇九江既浩蕩南浦
何逶迤洪都集冠蓋車馬紛往來彌楫劍江涘艤棹蕭
水湄金川對玉筍佳氣含朝暉諸生集衿佩瞻拜盛容

儀舍菜謹趨謁揖讓生光輝升堂聞絲竹宴會及茲時
優游敷文教作育懷切偲士風振頽靡俗化厚民彞末
學懲剽竊彌文戒夸毘由茲興治理簡拔有所資勗哉
志道德永矢期勿墮

悅琴軒

人生穹壤間所好百不同好之得其正德義日以充所
好暱於邪敗德墮厥躬惟此方寸內邪正恒相蒙君子
履正道秉志宜專攻理欲潛幾微毫髮寧相容如彼耨

苗者莠去苗乃豐又如藝芝蘭棘剪蘭始濃美惡若黑
白詎可昧所從惟爾負英邁閱出名宗衣冠振江右
詩禮夙所崇爾親我故交契誼超凡庸眷言托嫻好得
爾諧乘龍年來居貳室契濶心忡忡去冬來省謁晤語
愜寸衷或時聞揮絃悠然豁心胸淒清凌別鶴飄飄逐
遊鴻委蛇合宮徵滿坐聲淪淪神舒情轉懌體胖心自
融於焉禁邪僻蠶賊敢內訐爾能知好尚德義宜兼隆
所期力學問持身秉謙冲出入先孝弟周旋必敬恭惟

學可明德惟勤乃有功歲華易荏苒流光若轉蓬及時
宜努力黽勉毋怠慵蜚聲紹先世令譽垂無窮

予之甥趙瑛嘗學琴於子昭伯久之若有得焉者瑛
以去年冬來省子宮舍予或夜坐聞其操宮聲一二
引至其聲之疾徐高下動盪流麗亦不能無意會焉
瑛家居揭其軒之扁曰悅琴來北京請縉紳先生作
悅琴之詩以道其意予以琴士大夫一藝耳若能力
學問以造夫高明廣遠之域則其所得而樂者又有

過於是馮子故于詩歷述其意而勉瑛以學期之於
遠大此予愛瑛之至情也瑛其勉之

鴻臚寺卿王善父哀輓

壯遊去鄉邑卜築居燕城中年謝輪鞅遯世不求名布
衣自蕭散風月娛幽情杖履隨所適壺觴時獨傾詩書
課諸子笑談集良朋翛然忘世慮欣戚了不驚春秋餘
六秩乘化忽長征令子邁興運致身登明廷九重錫褒
秩追贈列九卿天章耀龍采雲漢昭日星大史最潛德

墓道揭新銘縉紳述哀輓淪淪揚嘉聲流慶殊未艾千
載想繼承

山溪小隱為周時立賦

梧山鬱蒼蒼沂溪流瀾瀾溪山兩奇絕居有泥田里里
中有著姓衣冠數周氏君子樂在斯恂恂謹操履力田
充食衣積學窮經史繞廬樹桑麻緣階藝蘭芷開窓白
雲來揮絃清風起門深駐山光庭虛湛流水賓朋或時
過觴豆同樂只酒酣賦新詩歌詠諧宮徵悠然適嘉趣

達生契直理蹇予迫衰暮役役果何似侍從三十春貪
榮昧知止況茲乏裨益誅惕久未已掛冠倘可期吾將
返其始來往山溪間庶以終餘齒

禮部新建諸卿設宴落成遂賦此

南宮壯巍巍落成在今日邇臣秩禮筵衣冠集儔匹獻
酬各有儀諧笑忘坦率千載幸遭逢昌辰慶文物成禮
貴無愆終焉敢怠忽

六月二十七日早朝奏孟秋時享

孟秋屆時享太常嚴齋沐聖主秉深誠詰旦興猶夙高
闕麗繁星彤墀散明燭百寮謹祀事祇命咸屬屬所期
答神庥庶以臻福祿

送周時立歸丈江

遠遊送將歸翩然辭國都迢迢越山川靡靡涉長途秋
風動原野殘暑猶未除玄蟬號樹端候鴈翔且呼豈伊
念朋好况復懷友于停盃且未別握手謾踟躕西江幾
千里雲水渺重湖子行日以遠會面日以疎及家雖云

金匱要略卷一
樂我懷將何如舊鄉未即返南望增鬱紆歸哉倘相憶
為我致雙魚

雨歎

入秋五六日風雨連夜朝屋漏水過膝路滑泥沒腰庭
花半憔悴田稼亦飄搖城中粟已貴城外無歸樵安得
捲癡雲太陽麗九霄使我開懷抱無復憂早朝

山東鹽運司副使蕭鵬舉輓詩

西昌有南溪著姓曰蕭氏傳家本淳樸積累自先世維

公實亢宗少小拔其萃孝友本天性急難志不匱拳拳
重手足同居篤恩誼和氣藹門閭紫荆兆嘉異一朝起
林壑浩然舒壯志待詔金馬門辭華著光麗承恩佐名
郡涖官益嚴厲布衣與蔬食儉素若寒士被譴忽遠去
曾不懷怨對榮辱恬不驚夷險惟一致再起應時需黽
勉服官事歲課每先期商民有遺利方茲圖報稱胡乃
遽捐棄室空無長物緼袍遺篋笥見者為嘉歎聞者增
歔歎春秋更代謝九原悼永逝令子志顯揚褒然掇高

第近者來京師一見非凡器昊天懷罔極孝誠實深至
乞我為輓辭屢請不一置憶昨公仕時我忝居禁侍兩
京曾晤面幸獲論鄉契縉紳仰風裁吏民稱善治豈知
十載間忽忽如夢寐自古各有盡聖賢皆如是令名可
長存死生那足計公歸可無憾貽後永無替殷勤寫長
詩臨風發深喟

輓周生渙

編脩叙之姪負外岐鳳之孫也

周生文江人來作金臺客負此英妙年讀書翰林宅幸

勤閱冬春講誦窮朝夕晝倦忘渴饑夜卧不就席丈采
照珊瑚星斗蟠胸臆摘詞已成章篇翰稍堆積語言不
妄發居處恒謹飭事長秉謙恭事親循禮則布衣不屢
更蔬食無厭數里巷少交游縉紳幸知識閒過詢所業
漸喜有進益宣知自去春遽為二豎迫淹延逾歲月形
容就枯瘠兀坐或終朝憑几或終日未忘親筆硯猶能
檢書籍臨終聲琅琅從容具盥櫛溘焉從此辭哀樂異
今昔骨肉增痛悲親知殊愴惻寒暑互往來時序迭更

易鴻雁正南翔原野迴蕭索茲辰返靈櫬祖送臨道側
山川邈悠悠魂魄將何適故鄉日在望行矣即窀穸顏
跖異壽夭善惡豈儔匹生年雖未多已能踵前跡百年
會有終今名垂無極今古瞬息間那足較失得生去日
已遠我懷詎能釋為生述此辭庶以慰存歿

瞻松閣

嚴陵有陳氏弟昆惟三人伯也嗣先緒理家儉且勤仲
也篤問學起家列朝紳季也鍾友愛器宇溫且淳三人

心不異夙昔均孝親親歿知幾載至今銜酸辛伯也懷
永慕種松繞孤墳墳前構高閣繁陰蔽青雲朝望松與
對暮處松為鄰松間日來往重壤賁九原時祭陳俎豆
馨歎若有聞風聲起悽愴雨露秋復春親去日已遠子
懷難重陳但使松益茂愛護崇本根世世勿剪伐永遠
揚清芬

浦雲樓為羅宗器賦

豫章有佳士磊落超常流久居厭諠雜復此構崇樓突

兀倚雲表翬飛凌斗牛綺窓間踈牖灝氣相盪浮西山
與南浦景物澹以幽朝登發佳興夕覽舒煩憂賓朋日
來往歌詠同倡酬臨風操猗蘭拂席看吳鉤閒來誦墳
典子史兼窮搜豈惟紹先緒實以光前脩昨者來京國
感子意綢繆索我題佳句未能為淹留離思鬱中腸條
已及高秋謾茲託鱸素寫懷寄滄洲他時倘歸老尚期
尋舊遊

送貢士鄒文選南歸

鴻鵠騰九霄，騏驎馳萬里。之子懷遠圖，學古希名士。竭
來與計偕，志欲取青紫。殊方會賢俊，冠蓋何旖旎。戰藝
奪文場，誓將掇高第。青雲忽蹭蹬，逸足淹泥滓。懷寶雖
難售，抱器寧終秘。歸哉不可留，翩然去知己。故鄉渺江
右，茫茫隔雲水。朝回一相送，懷抱殊礪礪。徘徊不能別，
何以寫深契。愧無千金贈，為子壯行李。千金未足多，贈
言重莫比。須知九仞山，功成少一簣。從茲更努力，慎無
中道止。賈董亦何人，垂名耀青史。明當繼芳躅，並駕騁

遐軌日月懸中天流光疾於駛相見在幾時重來勿淹
滯望子翔青霄庶以慰遐企

贈孔秉中考滿復任鄆城

先聖有孫子家住西江湄積學企前軌文采何陸離一
朝膺鶚薦飛步凌天池風雲際嘉會海宇同雍熙承恩
佐名郡蓮幕暫棲遲牛刀雖小試讚畫靡不宜所貴在
施設寧慙職位卑宦游逾六載朝夕任驅馳雅操厲冰
蘖清苦恒自持寸心悉民隱閭里無怨咨今秋辭洛邑

考績來京畿銓曹嚴黜陟三考固如期及茲命復職庶
以慰民思蹇予同里閑託好深相知闊別已十載道遠
音問稀都門一相見握手心怡怡張燈話疇昔有如消
渴饑胡為不暫住遽此歎睽離寒風正蕭索翹首雁南
飛殷勤酌別酒聊以寫心私人生百年內會合能幾時
願期樹嘉政贈言比箴規

贈熊元節還南京

有序

友人熊元節始以大理卿奉命撫巡吳越諸郡三載

之間鋤強植弱屏奸貪出寃滯威聲四達而吏民莫
不悅服比還朝上嘉勞之特陞秩長南京憲臺恩渥
之厚委任之專可謂極一時之榮者矣其還南京也
來索予作詩遂賦古選三十韻以攄別懷云詩曰

熊君負經術早歲登青雲素承明主知超擢中朝臣繼
聞陟大理奉命專諮詢風聲振吳越次第甦疲民鋤奸
去豪猾剋克格頑嚚遂令東南郡皞皞被皇仁聖情日
虛宁屢勅嘉勞勤三載積憂懼馳情懸紫宸及茲奏對

日款慰尤諄諄申命職憲紀榮光動朝紳南臺既專任
委寄真殊倫繡衣明白日清霜肅陽春豈惟戢貪墨實
以繩謬愆况聞澄清地表率由一身惟君秉直諒操履
端且純屹然重時望所至揚清芬塞予忝朝列交誼夙
所敦睽違渺南北夢寐勞心神幸茲諧簪盍晤對逾兼
旬忽聞別我去惻惻難為言驪駒發前路遙瞻動芳塵
衣冠擁廣陌絲管一何繁握手且未辭盡此黃金尊入
生會合間百歲若轉輪黽勉圖報稱致身在君親永懷

保終譽景仰希前聞廬陵多達士至今耀斯文忠節著
宇宙千載垂不泯勗哉踐古道永矢期勿諼

贈周子璫致仕還永豐

時為蘭溪縣丞

驅車欲何適駕言歸故鄉朋游具觴豆餞送臨周行憶
昨佐花縣志氣殊非常琴堂席未暖行役嗟靡遑京華
歷寒暑鬢髮皓已蒼布衣與蔬食澹泊常自將只今七十
餘謝事何匆忙為感聖恩厚悲歌激中腸徘徊不能別
念此故意長山川邈迢遞大江浩洋洋去途日已遠馳

景曜征裳愧無千金贈為子增慨慷歸哉慎自保南北
永相望

思金室為李士夫賦

人生天地間稟受良有偏七情失其正六脉為之愆因
茲致疾疚危弊紛相聯所以古先聖醫藥使其全姑蘇
有佳士仙李毓慶源上窺黃農秘術業尤精專兢兢念
疲癯惻惻閔危顛神樓有奇效一七生氣旋杏林藹春
意橘井流香泉蘇耽不可見董奉亦可仙超焉繼高躅

寧為利祿牽朝夕心匪懈活人澤永延勗哉慎終始令
名千載傳

慶壽堂為西溪蕭氏賦

西溪構高堂堂有白髮親親年齊壽考子孫復詵詵大
椿枝葉蕃萱草顏色新綵衣拜堂前旨甘具晨昏獻壽
酌春酒歡樂及嘉賓況逢太平時至和被八垠外無非
橫加內無憂患臻黃髮日優游慶澤流津津作詩誨盛
美庶以垂千春

贈郭郎中鼎貞還新淦

客行僻國都眷言歸舊鄉舊鄉渺何許雲山浩茫茫我
昔當壯年與子同翱翔交誼等金石志氣相激昂青雲
幸際會喜得同朝行睽違屢契闊南北遙相望茲來邁
衰疾乞歸何匆忙荷蒙聖恩許感激切中腸悵然別我
去執手徒徬徨鴻鴈鳴索羣我懷增慨慷涼飈動蕭瑟
川陸悠且長及家遂閒適為樂殊未央願言慎起處永
矣臻壽康

為王侍講時彥題秋意圖

長天帶遠景絕島含秋意
橋響客時過竹深門獨閉
蒼烟迴蕭瑟落日生迢遞
回首大江西故山何處是

題李仕璉山水圖

幽岑帶烟光遠嶼浮嵐氣
野水舟自回山居少人至
松聲度潺湲雲水生迢遞
對此欲忘言誰能識茲意

小景五首為楊少傅東里作

瑤林翠如織玉立何森森
虛心濯冰雪直節凌岑峯
炎

暑無六月清風生蒲林

右萬玉林

珊瑚出海底低拂鳳凰枝
蒼雪落寒影晴雲含碧滋
蒲湘不可到翹首起遐思

右竹石

王孟端作

幽岑澹碧靄古木生夕陰
泉石契清賞雲林諧夙心
即此得逍遙悠然豁煩襟

右山水

陳州起作

積雪沒深戶溪山絕行迹
鳥栖迷故林泉聲斷餘滴
中有映書人宴坐忘朝夕

右雪景

青山無垢氛野水多秋思
紅樹帶疎烟夕景生迢遞客

子欲何之孤舟出村際

右原闕

好學齋為邊給事作

伊人慕先哲積學恒孜孜好問不自己舜尹乃吾師於
焉燭萬理予以釋衆疑虛心如不足謙抑恒自持力行
期遠到賢聖固可希勗哉企前軌庶以慰所思

賦存心堂

君子秉恒性萬理備一心操存貴弗失恒恐蟲賊侵靈
臺湛虛寂天君若監臨主敬在朝夕先哲誠所欽勗哉

崇令德保此瑤華音

樸齋為給事趙文金賦

唐虞世已遠古道迷荆榛頽波逝不返淳風蕩無垠綺
紉尚美麗布帛何足珍良烹侈玉食菲粟難並論太樸
日已散彌文滅其真趙君抱冲素持守思益敦篤行合
前軌秉志期忠純清光邇禁闥載筆聯紫宸謹言懷激
切至誠諒斯存王風被寰宇禮樂在彌綸永期贊隆治
薄俗斯還淳

臘月廿日同陳俊文過武安殯所

爾亡忽兩月我懷獨悲傷北風號中野白日慘無光撫
樞為痛哭四顧增徬徨蒼天復蒼天奚忍降暴殃垂老
失愛子此恨何時忘

帝王膺受天命至聖之德格於天心故三光全而寒
暑時羣生和而萬物育是以上天昭錫景貺以彰盛
美欽惟皇上統紹鴻基主宰神人宵旰圖治至仁孚
於海內至信昭於天下華夷效順海宇清寧雨暘晦

明各順其叙時和歲登家給人足乃永樂十一年春
二月皇上再狩北京行慶賞黜陟之典田野之民莫
不鼓舞歡躍瞻仰日月之光華以為盛世太平之賀
乃夏五月丁未山東兗州府曹縣以騶虞來獻白質
黑章五采絢爛目光如電尾長倍軀起伏蹲卧不擾
不驚在廷臣僚洎蠻夷酋長與夫工商輿隸之徒莫
不奔走聚觀以為希世之遇臣謹按瑞應圖曰騶虞
義獸也王者德至鳥獸澤洞幽冥則見又云王者有

至信之德則應之伏自皇上蒞作以來諸福之物莫
不畢至而騶虞之應至是凡兩見皇上至仁至信之
德昭著于天下故上天錫以非常之瑞不一而足而
聖心尤謙抑退讓弗以自居拳拳焉申敷臣工以警
戒相成之道所以隆國家無窮之慶納生民於仁壽
之中而開萬世太平之基者誠亘古所未見而未有
者也臣忝職詞林躬逢盛事所當作為歌詩以播揚
鴻休不敢以淺陋辭謹拜手稽首而獻詩曰

聖皇握乾符御統膺寶歷宵衣運神化日昃弗遑息上
追虞周治遠邁漢唐迹禮樂聿昭宣人文煥奎壁雨暘
既順序寒暑靡差忒閭閻底豐富男女樂耕織洪纖悉
包含物各遂生植熙然際時雍鼓舞歌帝力天心屢眷
顧祖考亦昭格垂休降純嘏咸俾躋壽域奇祥繁繽紛
和氣寔充塞芳甸薦神龜南郊醴泉溢慶雲麗層霄膏
露時委積赤麟與紫鳳文采何輝奕維茲鄒魯區神禹
所經畫地靈協坤珎光氣常閔匿萃精毓仁獸於以符

至德祥飈振藪薄瑞采動厓壁神明為呵護民庶驚辟
易二虎從左右馴狎如服役及茲應時至入獻彤墀側
猊首而虎軀黑章而質白般般雲霞文粲粲雪霜色雙
瞳夾明鏡紫電光相射尾長倍其身墨花絢胸臆初陽
發光彩清水助標格生芻足不踐生物性不食俯仰帖
不驚舉動甚安適回翔荷恩寵天顏惟咫尺率舞同百
獸蹌然中儀則羣臣拜且抃聖情倍歡懌緬思仁獸瑞
曠世斯一獲周南託佳詠千古垂簡籍自從三代降茲

事遂寥寂我皇繼天位功烈超古昔往年致嘉祥來獻
自藩國茲晨忽再覩奇異誠難測自非神聖功上瑞何
由得我皇乃弗居誠心愈謙抑兢業同禹舜罔敢怠朝
夕微臣邇清光謬忝承明直愧乏班馬資獻納鮮裨益
耿耿懷丹忠再拜陳悃幅皇圖萬姬周歷年逾八百聖
壽天地俱寶祚綿萬億作詩諧頌聲庶以播無極

送蕭知州迪哲赴晉寧

憶昨居頻水與君同遨遊昕夕費磋切討論極搜求我

首竊科第侍從蒙恩優君繼領高薦簪筆侍宸旒瑣闥
同出入交契何綢繆忽茲膺寵擢出守涖名州朋從相
宴餞冠蓋擁道周寒子托姻好繾綣難為留商飈正嫋
嫋征旆何悠悠南雲在萬里道路阻且脩居行慎起處
毋為念離憂方今際聖明簡賢竚嘉猷牧守任撫字布
政先懷柔殷勤宣德意庶用安遐陬勗哉慎終譽永矣
揚嘉休

題賚溪釣者卷

齊溪有逸士世本商巖孫中歲慕恬適養晦居丘樊垂
綸不設餌志靡耽華鱗烟波浩渺渺魚鳥恒相親濯纓
弄夕影散髮晞朝暾企彼渭川窈洗心欲忘言俛仰終
宇宙此樂難具論

元夕讌集分韻得坐字

上元弛夜禁朋遊忽相過華燈粲中庭列席邀同坐呼
酒具殽饌觴詠更唱和繁星入戶明皎月當空墮九衢
沸簫鼓雜遝歡聲播幸此際昇平宸邁慙無那

北征晨起即事

客居寡情悰兀坐不簪纓侵晨見簪楚畏聞哀痛聲士
卒殊饑飽甘苦亦異情盜剽非得已困迫深可矜大將
搃戎鉞委托任匪輕人命在朝夕胡為死生

闕

送蕭深州復任詩

古稱循良吏者以其能順民之情不生事以撓之是
以閭里之間仰事俯育出入作息各得其所無饑寒
愁歎之聲若漢之龔黃卓魯之為治益可見矣子友

蕭公伯辰之在深州也寬而不失之縱廉而不失於
懦察民之情而不為苛刻之作度民之力而不為窘
迫之政省刑薄賦而事無不集發號施令而人無所
議是以境內晏然賴之若父母焉雖古之良吏何以
逾此今以兩上天官較其績為列郡之最有命復還
深州予喜公之為政有聞而惠足以及人且重有光
於鄉里也于其行作詩以道意且以期公之重來也
詩曰

聖皇馭九有圖治如渴饑求賢靡不至實期贊雍熙矧
茲郡縣寄休戚係黔黎簡擢苟不慎易以生怨咨深川
古名郡俗尚非昔時官守失其政凋弊日以滋公來敷
治理極力為撫綏吹噓振枯朽扶植蘇癯疲欣欣沐膏
澤煦煦蒙春輝於焉樂生遂有食且有衣徭役既不後
租賦自有期豪強遵約束吏胥憚嚴威黃堂白日靜終
歲忘鞭笞心清事逾簡絃誦有新詩潁川績可擬渤海
名堪齊及茲逾兩考奏最咸稱宜還官既有命五馬何


光輝都門一相送握手暫踟躕春風正駘蕩桃李還芳
菲酌君光祿酒盡此黃金卮深州日在望速往毋遲遲
相期在遠大勿用傷睽離候君重來日三考榮超躋努
力慎終始庶以慰遐思

素闇為九江貳守魏宗昆賦

素闇有佳士抱志何休休綺麗非所貴澹泊寧自羞返
樸存至理窮源遏奔流古道邈難復努力追前脩

六月廿一日立秋偶題

金文靖集卷一
雨日風雨過滿目皆秋意開軒灝氣回入座涼颿至高
梧響蕭蕭鳴蜩方嘒嘒坐念寒暑更令人發深喟



金文靖集卷一

欽定四庫全書

集部

金文靖集卷三

詳校官編修_臣裴謙

中書_臣劉源溥覆勘

總校官進士_臣朱鈐

校對官中書_臣楊世倫

謄錄監生_臣王聞

欽定四庫全書

金文靖集卷二

七言古詩

雪窩為翰林修撰苗東賦

泮池凍壓芹藻香雪窩湛湛通銀潢瓊姿玉質炯寒素
短櫺碧檻凝清光蓬萊浩渺徹銀闕羅浮夢裏何殊別
淨色微含冷淡風暗香遙度黃昏月當年美人尤好奇

明 金幼孜 撰

對此轉覺心神怡花明高閣朝吟處簾捲寒窓夜映時
只今遠隔西湖側欲托幽棕那可得青綾僦值玉堂深
夢寐猶疑照顏色新圖貌得重南金時來展玩清煩襟
為君揮翰寫長句願保平生貞白心

題松鶴

薛公畫鶴藝殊絕真蹟人間半磨滅玉堂退直見新圖
毛骨蕭疎渾彷彿丹砂作頂霜作翎迥立松梢壓蒼雪
試看挺特仙客姿軒昂豈是樊籠物萬里高搏遼海風

一聲清淚臨臯月忽然振翼將遠舉雲薄天空一起越
肯學池塘鷗鷺羣啄食卑汙外空潔懸知素壁玩且久
似有涼風起寥泚赤松異日許同遊借爾翱翔向金闕

上林春雨圖為御史羅亨信賦

上林竹深綠如簣瀟然一片瀟湘色春雨溟濛天際來
淨洗琅玕澹空碧恍疑白晝鬼神驚散作碎玉聲琮琤
濃深半隱玄豹色蒼翠低含紫鳳翎忽然雲霧生眼底
似覺陰生帶秋意乃知畫者妙入神力斡天機有如此

知君愛竹非尋常寫入圖畫情難忘歲寒節操慎自保
凜凜應同御史霜

贈傅子楫德安教授

京師仲冬月天氣寒栗冽客懷已無歡況與故交別先
君昔教臨江時我亦攜書侍講帷春風游泳泮池上惟
君與我最相知君心磊落懷奇寶自分青雲致聲早一
從領薦上京華拜官得似儒官好蘄州振鐸經幾年廣
海旋開席再遷樂城契濶三載餘又聞書考來朝天相

逢頃覺容髮改却羨當時好風采論心但喜別懷舒話
舊猶看故情藹只今南去沐榮恩盡道德安風俗淳朝
回相送情怱怱作詩聊以申殷勤征車軋軋金臺路落
日風沙渺烟樹人生聚散胡爾為况乃相看各遲暮君
行遠道勿蹉跎正值歲寒霜雪多德安早到如相憶莫
道衡陽無雁過

贈貢士王志浩赴東莞訓導

東風三月鶯亂啼都門冠蓋相追隨鄉人故舊領除命

布衣一日生光輝王郎素非尋常者浩氣凌霄絕瀟灑
昔年充貢登成均萬里青雲重光價已看蟾宮擢高枝
復聞戰藝來春闈霜蹄暫蹶未為失一官雅稱克儒師
番禺南望渺何許便道還能過鄉土梅雨連村旅舍昏
林陰滿地郵亭午懸知到日夏方深杏壇書永分清陰
臯比日宴說經史座間濟濟皆青衿况當聖治文明日
宵旰孜孜在儒術茲行仰體聖明心作育羣才須努力
朝回送別惜匆忙且盡花前酒一觴嶺南若遇回京使

猶待槭書寄玉堂

次少師姚廣孝禁體雪詩韻

歐陽公雪詩不許用梨梅練絮白舞驚鷗

等事謂之禁體

江空歲晏天作雪
滕六先驅勢逾裂
同雲慘淡始異色
眼底紛紜忽驚瞥
山川高下漸堆積
東西岐路那分截
晨光炫爛隱烏彩
夕景微茫封蟻垤
上林千樹復相宜
九重雙闕何殊別
金河水淺凝不流
玉碗無聲凍先結
滿城泥滑馬蹄深
空院香清鳥聲絕
不聞窓外林葉聲

時聽階頭竹枝折聯翩亂洒入衣袖宛轉斜窺投隙穴
拂檻穿雲去復來隨風帶雨吹還滅書生把卷愜清妍
紅女停針愁凜冽貂裘翠被未覺溫火井湯泉那復熱
棹回剡曲發佳興詞傳郢客停歌舌淮陰破敵誇神速
渤海思家歎駸肩知公素有冰蘖聲歲寒不變青松節
梁園賦就筆屢呵石鼎新烹水微咽臘前預喜兆豐年
潛祛螟螣消餘孽陰陽順序民物和昭錫異瑞天心悅
嗟予才薄慚蹇蹇十年載筆詞臣列捐軀報國誓匪他

長秉忠誠心似鐵朝回看雪天上來屬和長歌資一呷
重午日侍從內苑觀擊毬射柳應制

大明麗天聖人作弘宣治化昭禮樂華夷嚮風四海清
人和歲豐物咸若翠華五載重巡幸經營北都同卜洛
惟時帝京值重午習武馳毬戒程約霓旌鳳蓋天邊來
禁苑清晨張御幄騰騰虎士盡貔貅劍戟相摩耀鋒鏑
毬門結束正當中兩朋左右雜相角玉花驄馬絡青絲
錦衣繡服相輝燦吹簫伐鼓雜鳴笳馬前奮擊爭揮霍

星飛電掣合變化神珠宛轉當空落翻身奮臂挽琬弓
白羽交飛向寥廓穿楊百步巧難工分籌得雋咸驚愕
至尊有喜動顏色御前勅賜恩尤渥侍臣載筆預簪花
宮壺賜飲黃金爵酒酣獻壽效嵩呼傾竭丹誠比葵藿
作詩再拜進蓬萊欲擬長楊慚謏薄神功聖德不可名
萬歲千秋等喬嶽

張孝子歌為尚寶司丞張信賦

我聞山東張孝子早歲啣哀報嚴父昊天罔極恩莫酬

教育維持賴慈母母年未艾孝彌敦奉盈執玉心所存
雞鳴問寢候堂前婉容愉色如春溫綵衣娛侍供調膳
從容食飲頻相勸每懷鶴髮未成霜筋力愈強身愈健
三春慈竹陰滿堂萱草含綠凌冰霜板輿緩挽向東風
穿竹看花清晝長花前酌酒仍高歌壽觴迭進慈顏和
子孫滿前母更壽此樂人間真不多竭來孝親名譽起
奉檄作官親更喜紫誥迴鸞下五雲詔書褒錫光閭里
九重親切掌帝符日趨瑣闥鳴珮琚況聞伯兄更脫畧

十年執戟儕金吾近者受命殄賊曹南征萬里清海濤
弟兄忠孝有如此一心只欲愉勤勞古來事君違所親
事親寧復能忠君子今際遇事明主得祿奉親逾古人
嗟哉孝子不易得勗子終養崇明德何時升堂為母壽
更作長歌寫胸臆

為楊庶子題紙屏畫竹

我昔隱居在山谷繞舍只令種脩竹清風白晝洒蒼雪
終日吟哦看不足一從攜書來北闕遂與此君成久別

平安十載知何似往往思之心欲折楊君亦是愛竹者
官舍新成最幽雅紙屏拂拭無點塵滿寫琅玕更瀟洒
昨來置酒邀客子燈前見之驚且喜停盃借問作者誰
似與老可同高致墨花淋漓真可愛黯淡猶疑鬼神會
初看積翠落簷端便覺湍聲起窓外數竿隔水各千尺
微露青林帶秋色暮雨寒霏紫鳳翎驚濤暝卷蒼龍翼
知君好竹幽思殊朝回看畫仍讀書臨風或吹蒼玉管
對月時弄青珊瑚嗟哉此君貞且良丰姿凜凜非尋常

世情高下逐冷暖此君志節無炎涼冰霜歲晏慎自保
相期白首毋相忘

洪厓山房歌為祭酒胡公作

我聞洪厓山水好往往思之不能到今君却憶洪厓山
欲結茅廬傍幽島畫圖點染寫深思數來邀我題新詩
展圖試覓幽棲處洪厓千仞凌空垂洞口寒雲杳莫分
石橋流水長潺湲閒來或有漁樵到盡日那聞雞犬喧
丹霞碧樹連幽嶂翠壁青林更蕭爽落花啼鳥自四時

芝草琅玕日應長君家玉峽我故鄉幾年卜居來豫章
城中地窄少耕種唯有圖書堆滿牀憶昨射策辭鄉縣
承恩數上黃金殿玉堂視草袖天香花裏迎鑾侍清宴
謁來扈從金臺北載筆還為兩京客漸覺奔馳筋力衰
纔過五十頭俱白西山峩峩江水深悵望洪厓違宿心
詠歸未有陶潛賦招隱空懷桂樹吟嗟我平生慕幽雅
亦欲移居玉山下蒼松翠竹不用栽石田野圃寧須借
幾時詔許乞身閒共脫朝簪尋故山預約洪厓結茅屋

江上扁舟相往還

為勉仁學士題王孟端所畫松檜圖

長松參天苔蘚碧飛泉迸落蒼厓石霧雨三秋入杳冥
風林六月含蕭索伊誰妙筆與神通力斡造化千鈞雄
此材卓犖為世用老大猶當備梁棟老檜蒼蒼擁高蓋
交柯崛起蛟龍背懸厓慘淡雷雨生白日蒼茫鬼神會
朝回坐對太古姿凜然不受霜雪欺為君歌罷久嘆息
要知畫好如此詩

徽廟古松山鵲為顧進士作

松梢盤拿出巖壑一夕山風吹子落幾迴度澗聽松聲
橫枝忽見飛來鵲翠衿紅觜一何奇誤疑青鳥降瑤池
根深茯苓不易斲王母羽蓋今何之宣和宮中迹如掃
胡沙漠漠天地老莫向松間占鵲聲五國城荒長芳草
大若靈根為醫者顧東啓作

吾聞永嘉朱孺子幼慕玄真王道士鍊藥真棲大若巖
日服丹砂學冲舉時從絕嶺斲黃精餌之十年道不成

偶來溪邊見二犬奇形異狀忽心驚追踪逐影何恍惚
枸杞根深下盤屈乃知此物鮮通靈採食應能致仙術
斬根淨洗清溪流寶鼎溫溫瑞氣浮煮來三夕火不絕
味若崖蜜傾金甌孺子飲之驚且悟便覺胸懷洒甘露
清風兩腋肌骨輕白日飛騰入雲去玄真引領慕昇仙
西陶山中自長年山人往往尋蹤跡出沒隱顯隨風烟
君家業醫今幾世活人功多人感惠何用當年枸杞根
滿林紅杏皆春意

送太守盧玉潤還新淦展墓

薊門十月多北風道上垂楊枝已空離筵呼酒勸行客
酒杯有盡情無窮盧君自是同鄉里況復青雲托知己
選部曾推藻鑑明朝端共說才華美一朝承擢守錢塘
朱幡皂蓋生輝光布宣德化耐繁劇撫字黎庶多慈良
是邦從昔稱難治閭井欣欣樂君至數邑豪奢自斂蹤
海濱赤子無遺利政成九載復朝天喜得論心向日邊
九重奏績策書最萬里承恩暫賦還匆匆話別臨長道

昨日紅顏總衰老風前鴈影去人遙馬上孤裘覺寒早
南上歸舟莫太遲梅開定是到家時鄉中故舊歡迎處
應歎昔遊今若斯歸榮書錦誠堪羨桑梓情深難久戀
明年八月候趨朝五雲深處重相見

瑞兔

具色玄從闕西來進

聖皇一德膺天命省方巡守因時令維茲靈兔表瑞徵
一色玄膚如玉瑩毫端純潔明且淨迴身滃若玄雲凝
目光點漆微開鏡黑毳毼毼相映鋒稜矯矯塞逾勁

意氣直與秋空迥適當玄冥司斗方乃有此鬼色純正
貢來玉階朝萬乘百辟抃舞歡呼競撫摩馴擾有異性
白麟朱雁安足勝奇哉此鬼遭榮幸沐浴膏澤為靈應
瑤圃嬉遊誰與並小臣拜覩形歌詠萬歲千秋頌神聖

瑞應甘露詩

聖皇御宇四海清際天極地俱來庭誕敷德教及遐邇
重熙景運昭文明九重端拱成至治恩澤汪洋悉霑被
至和薰蒸盈兩間上瑞奇祥日相繼永樂己亥維仲冬

天乳明潤當太空孝陵戔戔霄漢上甘露又降松栢中
彌柯布葉總醲郁絢彩流光滿山谷遙看宛若綴蟻蛛
近覩猶如屑瓊玉千林萬樹動晴輝天風吹香襲人衣
網緼本是和氣結璀璨不逐朝陽晞數日霏微亘朝夕
湛湛濃濃厚愈積天酒空聞自古傳神漿始向今時得
臣民慶抃傳京師東宮採擷心更怡玉壺盛取獻天子
囊以文錦登丹墀金門洞開瞻黼宸龍顏悅懌稱絕美
當殿傳宣賜近臣滿朝動色懷深喜須臾分賜徧得嘗

全覺飴錫難比方豈猶心神益清爽頓使疲繭臻平康
臣聞禎祥不易致萃美凝英逢盛世聖德巍巍治道隆
靈貺駢蕃出天意慶雲煥耀映皇都壽星夜粲天南隅
瑞光郁郁成五色彌滿宮城遶帝居嘉禾瑞麥紛疑疑
麒麟騶虞靈囿裏京樹烏翔色似霜仙井泉流甘若醴
還看玉兔貢紫宸毛質漆黑誠可珍煌煌瑞牒難備錄
又見甘露來茲辰皇心乾乾尚謙抑德配軒堯與天一
上帝景命重眷顧太祖神靈永昭格小臣拜進甘露篇

嵩呼蹈舞玉階前
皇圖聖壽同天地
陛下鴻名萬古傳

長角獸歌

其名馬哈獸

聖人端拱御八方
車書混一超虞唐
仁恩義澤霈洋溢
雨暘時序民物康
南極炎荒北窮髮
西逾月窟東扶桑
陸警水懷悉稽顙
輦琛奉贄來梯航
維時天心眷皇德
紛紛總總來奇祥
麟虞在郊鳳在藪
白鳥馴雉叅迴翔
醴泉出地甘露降
嘉禾瑞麥何穰穰
前年西域貢獅子
赤豹神鹿紛成行
今年海外見奇獸
殊姿異狀尤非常

茸茸紫毳瑩蒼壁兩角稜稜三尺強非兕非豸亦非鹿
玄雲翳鬱凝天章雙瞳夾鏡黑如漆四足捷疾行踴踴
徵圖考牒不可辨載稽博物何茫茫遠人效貢擬珍異
徑涉大海揚飛檣薦之雕籠藉芳褥再拜奉獻登明堂
是時九重啟閭闔旭日照耀森開張祥飈瑞靄相拂掠
佳氣鬱勃歡聲揚乃知聖德極廣遠覃及庶類蒙恩光
豈知此獸更奇絕性質馴雅勝白狼玄犀角耑未堪擬
九真所獻那足方虞廷率舞先百獸上協簫韶儀鳳凰

太平幸際千載會願紀鴻績鐫琳琅陳詞稽首歌聖德
天子萬壽地久同天長

福祿獸歌

狀似驢

有獸有獸名福祿逸態奇姿異凡畜身高五尺力如虎
一日千里超驥足奇文間錯分黑白毛質無瑕瑩如玉
目光瞳矐夾明鏡掩映玄雲散朝旭紛紛縞毳雪花寒
皓彩瑤光何煒煜超騰迥覺長風生一鳴解使百獸服
海南之國卜刺哇乃有此獸出大麓虞人致之匪羈紲

弗迫弗驅自馴伏萬里飛航度海來天吳海若相叅逐
山川處處流光彩祥烟瑞靄飄芬馥清晨導引獻九重
從以玄犀與神鹿乃知聖德被廣遠航海梯山日相屬
遠人稽首貢方物異瑞奇祥莫殫錄駟虞麒麟在靈囿
渥注龍媒聚天育願將職貢寫成圖一統華夷集諸福
吾皇萬壽與天齊聖德神功昭簡牘

為禮部金尚書純梅花圖

尚書示我梅花圖雪色一片涵冰壺歲寒蕭索少儔侶

偃蹇頗覺形容癯南枝一夜回枯槁漏泄人間春信早
纔看冷蕊耀晨輝又見繁花照晴昊羅浮山人無俗塵
參橫月落長相親仙姿縹緲出姑射白玉為質冰為神
水邊籬落幽深處梨雲半掩瑤臺樹紙帳虛明素影分
銀屏皎潔寒香度向來孤山風物清千葩萬幹何縱橫
林逋幾度愜幽賞長吟屢遣花神驚只今零落無知己
惟是西湖渺烟水回首當年放鶴亭千古清風孰能擬
尚書愛此圖畫工標格直與梅花同正當鼎鼎調元日

願報吾皇恩眷隆

獅子歌

有序

聖天子德極天地明並日月化被萬方仁及庶類上
安下順內綏外懷陰陽協序萬寶告成田野熙洽無
鬪爭金革之聲蠻方君長稽首稱藩歲時貢獻梯航
聯絡比肩接踵而至者日不暇給而凡昔之紀於載
籍所不常有之物或聞之而不可見者今皆目覩其
盛若騶虞麒麟世皆知為仁獸寥寥數千載未有能

識其形似之真者我聖天子臨御之日騶虞凡再見
至於麒麟之祥亦兩自海外數萬里而來其餘若名
馬文犀紫象赤豹之屬蓋以為常貢而弗之數者今
西域自流沙踰崑崙歷玉門關以達於中國又不知
其幾萬里乃汲汲焉走一介之使檻獅子以貢其嚮
慕於聲教者何若是其至哉稽之往牒獅子即狻猊
也如麀貓能食虎豹威伏百獸日行可五百里今觀
其狀似虎猛而壯銅爪鋸牙廣額巨頰尾大而長目

炯炯如雷聲哮哮震撼山嶽撫摩之不懾不懼蹲跼
拜伏游戲舞躍皆能解人意有不待馴擾而能者自
邊徼達於京師歡聲四動觀者蟻附而公卿大夫與
執事莫不榮耀慶幸以為千萬載之奇遇且相與發
揚蹈厲作為歌詩以稱頌聖天子之威德光明宣著
覃被四表不以幽而弗燭不以遠而弗屆且以見殊
方絕域畏威慕德臣僕於中國者極其歸仰愛戴之
誠蓋自書契以來包舉六合統一夷夏開萬世太平

之業未有若今日之為盛者也臣忝職文字躬覩盛
美不可無紀述以傳示將來謹拜手稽首而獻詩曰
聖皇御天弘廟畧敷宣鴻化昭禮樂登庸俊賢親簡擢
河清海晏雨暘若民物熙熙遂耕鑿奇祥異瑞疊昭灼
朝野頌聲相繼作封疆視古益恢拓幅幘相距何寥廓
東窮扶桑南海角西涉流沙北荒漠山梯海航日聯絡
玉帛筐篚紛交錯侏僂椎卉相唯諾奔走貢獻填郊郭
金天之西路綿邈粵有神獸匿深壑非熊非羆亦非駁

咆哮一聲震崖壑曰為獅子何卓犖百獸見之遁且却
象犀虎豹狸與貉伏地腦裂俟其獲西人致之脫羈縛
載之雕闌覆以幄雄風長雲相拂掠遠逾流沙度河朔
黃金臺前霜正落五雲輝輝映樓閣觚稜曉月明金爵
閭闔九重方啓鑰遠人致詞甚敦樸薄貢遠物效勤慤
毛為黃茸光濯濯兩目晶瑩驚電爍銅頭鐵筋紛犖确
奮髯吐舌聳齟齬尾大如斗何揮霍軒然猛氣如欲搏
左顧右盼喜而躍衣袂日月榮恩渥䟽滌雨露遠氛濁

飽食紫芝謝叢薄瑤圃瓊林以為託乃知聖皇德至博
同仁一視靡厚薄聲教所暨如橐籥指揮萬國在掌握
威服強梗懾暴惡邇安遠懷遵約束神功巍巍等山嶽
小臣獻詩愧雕琢萬歲千秋歌永樂

拜和聖製元夕觀燈詩

天眷皇明基祚隆肇建兩京壯且雄龍樓鳳閣倚天表
飛甍傑構凌層空鴻圖鞏固地同厚寶歷綿久天與崇
祥雲耀采析木上佳氣遙接扶桑東西山千仞列屏幃

河流九曲如朝宗連城迴抱負滄海重關截竊臨居庸
九重冠蓋自濟濟五城鐘鼓何泯泯恢弘盛烈莫倫擬
綿延慶澤無終窮萬機圖治意尤切奉天勤民心愈忡
羣生熙洽際文治萬國清寧昭武功風調雨順樂生遂
潛消疾癘無疚恫是時玉京值元夕陽和應候回春融
六鼇戴山來海上千仞突兀摩蒼穹金吾奉勅弛夜禁
太平樂與華夷同鑾輿乍臨丹闕外璧月正照青天中
綵樓深護芙蓉暖瑤波蕩漾金蓮紅祥烟細繞笙歌隊

金史卷二
天香時度羅綺叢賞心樂事固不偶良辰美景真難逢
小臣感激荷恩寵拳拳補報懷攄忠仰瞻宸翰煥奎壁
妙參造化天同工都俞賡歌繼虞舜垂衣致治濟軒農
斂時錫福集靈貺坐令寰宇歌年豐願期聖壽齊天地
萬年永樂同熙雍

秋日登萬歲山

萬歲之山高插天遠摩蒼翠凌紫烟瓊樓玉樹何娟娟
鶯啼白晝出深谷縞鶴歲久巢松巔洞門陰陰苔蘚碧

石澗九曲通流泉日轉金輿經翠巘風迴仙伏度花前
天香遙散廣寒外紫翠近落瑤池邊方壺員嶠果安在
閨風瑤圃徒虛傳偶來登覽上絕頂便欲振袂凌飛仙
凌飛仙坐閱天地長不老上下日月同周旋

分韻得西山晴雲送蕭郎中伯辰之官南京

西山嵯峨挿天半長日晴雲散空外霏霏郁郁爛成文
兀兀童童列車蓋紛紛五彩發青紅流丹曳紫輝層空
朝連翠靄絢初日暮帶浮嵐逐斷風深州太守最瀟灑

十載看雲愛幽雅昨來拜命尚書郎振袂忽辭雙闕下
平生忠孝廉且勤聚散尋常寧足論從龍早已應嘉運
為霖尚想攄經綸西山回首日漸遠還望飛雲重留戀
南宮更喜對鍾山看雲坐憶題詩徧

何將軍山林圖詩

有序

同邑何叔安所居在金川之潭溪左右皆佳山水因
追慕何將軍山林乃命畫者為圖而求予作詩其上
遂為長歌一首以寫其山林之趣且以徵後會云耳

詩曰

寰中山林無處無奚獨將軍名最都不因工部有佳句
後人那得知其故金川玉峽秀且奇潭溪更在金川西
將軍奕世遠孫子繼承文采尤光輝名園綠水南塘麓
第五橋邊富脩竹真宰何年驅六丁掇取靈區過潭曲
石欄點筆聽流鶯銀甲金魚舊日情四時佳致宛猶昨
一段勝景真天成何郎意度尤瀟洒貌取山林入圖畫
朝來訪我歡相持索我題詩說鄉社臨風濡毫為寫之

却憶故山勞夢思濠梁谷口未應遠白雲流水還相期
明當乞假向天子錦衣快着歸鄉里預擬山林作勝遊
馬蹄踏徧烟霞裏

金文靖集卷二